

GOSOS DE NOSTRA SEGNORA DE SU NIVE

*Mistica brillante Aurora
Clara istella mattutina
Ave, celeste Reina
De su Nive alta Segnora.*

Scettru de divinidad
Ispiju de ogni virtude
Portu de vera salute
Pro totta s'umanidade
De sa Santa Trinitade
Mama, Fiza e Ispos'ancora.
Ave celeste etc.

Cando in Tronu Pontificiu
Liberiu regnaiat
Chi sempre festigiaiat
Su divinu sacrificiu
Recit summu beneficiu
D'ogni anima peccadora.
Ave celeste etc.

Cando cun devossione
Patriciu ti giamesit
E ca prole non tenzesit
Fit in tant'afflissione
Cun profunda orassione
Ti preghesit a dogn'ora.
Ave celeste etc.

Ad onore no ischiat
Ite operare pro te
E discurrenit in se
Chi una ecclesia fundaiat
Ue acclamare ti diat
Patrona e superiora.
Ave celeste etc.

In sonnu essende dormidu
In persona cumparzesit
A Esquilinu li nesit
Chi prontu esseret partidu
Chi inie fi decididu
De esser sa fundadora.
Ave celeste etc.

A Liberiu similmente
Has in sonnu illuminadu
Ed un una has congregadu
A su Clero unidamente
Onorende allegramente
Sa Suprema imbassadora.
Ave celeste etc.

Totus partin cun premura
Cun d'unu modu benignu
Hue mustran su disignu
D'un'immensa biancura
Contenende una friscura
Suave e consoladora.
Ave celeste etc.

Ecco subito complida
S'est s'opera disizzata
Ue sempre venerada
Ses dae sa gente affligida
Chi in s'ultima partida
Ti jaman pro difensora.
Ave celeste etc.

MAMOIADA

Unicu divinu tesoro
De sa cristianidade
O Mamma de piedade
Abblandade cuddu coro
Chi hat perdu su decoro
De sa patria duradora.

Ave celeste etc.

In s'Empireu sempiternu
Ses Suprema imperatrice
Consolu de s'infelice
Domo de su Babbu Eternu
Pro terrore de su infernu
Naschistis triunfadora.

Ave celeste etc.

Già chi donu ispeciale
Has in manos dogn'istante
De s'anim'agonizzante
Ses meighina totale
De grassias senza eguale
Pro totus dispensadora.

Ave celeste etc.

Finalmente a sos clamores
Attende e a su piantu
Sutta su sacradu mantu
Ampara sos peccadores
Pro sos immensos errores
Committidos a dogn'ora.

Ave celeste etc.

*Mistica brillante Aurora
Clara istella mattutina
Ave celeste Reina
De su Nive alta Signora.*

GOSOS DE SOS SANTOS COSOMO E DAMIANU

*Già chi tenides tanta manu
Subra d'ogni infirmitade,
sos nostros males sanade
Santos Cosomo e Damianu.*

In Egèa sezis naschidos
De Arabia grande zittade
In cristiana caridade
Dae pizzinnos istruidos
Et dae totu applaudidos
In su populu cristianu.
Sos nostros etc...

Eccellentes in dottrina
Dottos in d'ogni scienza
Ma ue plus sa sapienzia
Mustrezis, sa meighina;
Cun arte tantu divina
Su malaidu restat sanu.
Sos nostros etc...

Totu cuddos chi trattades
Bos rispettant et bos amant
Sos Anargirios bos giamant
Titulu chi meritades
Pro chi de badas curades
Senz'interessu mundanu.
Sos nostros etc...

S'ecellente caridade
Ch'in su pettus bostru ardiat
Prontamente bos moviat
A succurrer cun piedade
In tanta nezessidade
A su corpus malu sanu.
Sos nostros etc...

Luciferu imbidiosu
Trattat de bos persighire
Pro chi non podet suffrire
Impleu tantu piedosu
Ue salute et reposu
B'hat pro d'onzi cristianu.
Sos nostros etc...

Si mustrat tot'impignadu
Cuddu inimigu infernale
Chi d'odiu fieru et mortale
Su tirannu hat ispiradu
Pro chi bos'eret ligadu
Cun modu meda inumanu.
Sos nostros etc...

Pro sa vera religione
Et odiu a sos cristianos
Ligados pedes et manos
Bos ponzesit in presone
Lisias senza rejone
Crudelissimu tiranu.
Sos nostros etc...

A sas falsas deidades
Bos cumandat adorare,
Basciu pena de proare
Immensas barbaridades
Penosas crudelidades
Inventadas dae Paganu.
Sos nostros etc...

Su tirannu isperanzadu
De bos poder conquistare
Bos fattesit azzottare
Barbaru disapiendadu
Ma su disizu et coidadu
Li ressesit totu invanu.

Sos nostros etc...

In s'incostante elementu
De sas abbas de su mare
Bos cherfesit annegare
Ma cun insigne portentu
Bos ponet in salvamentu
Un Anghelu soberanu.

Sos nostros etc...

Sas fiammas tant'ardentes
De unu furibundu fogu
Contra bois no hant isfogu
Et bos palpant reverentes;
Ma bruxant a sos presentes
Ministros de su tiranu.

Sos nostros etc...

Lisias plenu de furore,
Zegu in mesu de sa lughe
Bos ponzesit in sa rughe
Pr'odiu de su Redentore
Et bois tantu disonore
Suffrezis cun cor'orfanu.

Sos nostros etc...

*Bois tenides tanta manu
Subra d'ogni infirmitade
Sos nostros males sanade
Santos Cosomo e Damianu.*

Sende in sa rughe ligados
Pedras, frizzas bos pioiant,
però a bois non lompiant
proite fisis preservados
dae su Chelu, et amparados
dae sa Onnipotente manu.

Sos nostros etc...

Finalmente degogliados
Cund'una crudele ispada
Sa corona suspirada
Lucrezis affortunados:
in su Chelu collocados
favorid'a su cristianu.

Sos nostros etc...

A bois totu accudimus
Pro donzi nezzessidade
Santos mios, remediade
Tantos males chi patimus
Et su pius chi nos timimus
Perder a Deus soberanu.

Sos nostros etc...

GOSOS DE SANT'ISIDORO AGRICOLTORE

*Messaiu miraculosu
 Pienu de divinos raios
 Pregade pro sos messaios
 Isidoru santu gloriosu.*

In Madrid hagus rajadu
 Sos primos bostros albores
 Cun piùs vivos resplendores
 Hazis s'Ispagna illustradu
 Rajos hazis dispensadu
 Piùs de sole luminosu.

In su fiore de sos annos
 De sa ostra piccinnia
 Fatestis sa messaria
 Cun ammiru de sos mannos
 De sos piùs teneros annos
 Binchidore valorosu

Innantis de comenzare
 De sa terra sa coltura
 Dogni die cun termura
 Visitestis templu e altare.
 A Jesus pro dimandare
 Fruttos de eternu riposu.

Cando fistis occupadu
 In sa santa orazione
 Pro divina disposizione
 Cuddu travagliu paradu
 Sos anghelos cun s'aradu
 Suppilian cun summu gosu.

De un'abbundante regorta
 Pro esser su mere in suspettu
 Li destis su trigu nettu;
 Sa pazza un'atera orta
 Bentulende, già arregorta
 Desit fruttu piùs ubertosu.

Su mere tantu ansante
 De sidi in sa ostra domitta
 Tocchestis cun sa palitta
 Sa terra e cuss'istante
 Bessesit abba abbondante
 Contra su sidi fogosu.

Custa vena mananziale
 De prodigios ricca mina
 Est rimediu e meighina
 A su piùs teneru male
 Donat salute finale
 A s'infirmu perigulosu.

Zegos, zoppos liberados
 Presos de morbu letale
 S'amparu ostru speciale
 Invocande sun sanados
 Malaidos disperados
 Bos acclamat portentosu.

MAMOIADA

A su viadore meschinu
Hazis dadu accattamentu
Alloggiu e sustentamentu
Intrada a su peregrinu
E a su Messias divinu
Fatigadu e affannosu.

De su chelu tantu amigu
De messaios protettore
In tempus de asciuttore
Dade nos abba a su trigu
Chi su poberu mendigu
Non de siat bisongiosu.

De peccadu senza neu
Cumplidu hazis sa gherra
De custa misera terra
Bolesit s'anima a Deu
Su corpus sagru e intreu
Adorat Madrid diciosu.

Pustis cun fama notoria
Bos hat distintu su chelu
De custu mortale velu
Portade nos a sa gloria
Cun palma de sa vittoria
Contra s'inferru orgogliosu